

玉山名勝集

下冊

〔元〕顧瑛輯 楊鐮 葉愛欣 整理

中華書局

〔元〕顧瑛輯
楊鐮 葉愛欣 整理

玉山名勝集

下冊

中華書局

玉山名勝外集

玉山名勝外集

（明萬曆刊本《玉山名勝集》卷六）

紀錢送

送澗東副元帥巡海歸鎮詩并序

國朝自平宋以來，歲漕東南稻米由海抵京邑，至正八年春，海寇暴作，焚官儲，劫帥臣，賊噪譁勢張甚。朝廷命各道出師，據要害摧截其角牙，歲以爲定制。十年，浙東副元帥鎖住公總兵在行，公聞命，即戒嚴出次外廷命。家事雖甚利害，毋以白。整軍由桃花口入蛟門島，截東門山，鼓行大洋中。鯨波颶風，朝夕迅發，無幾微慝色。號令斬斬，不聞驢譁聲。先是，各道出師多爲民病，公所至，民不知有兵。賊間聚海島者，相視愕眙，鼠竄他境上。凡三月，糧既率事，由崑山劉家港取陸路歸鎮行省。右丞慶喜公把酒勞問苦，見所佩弓矢強勁非常比，命左右控弦，率不能彀。公據牀持滿射，命中。過港，數十步觀者不敢出氣。既告行，飲酒故人玉山艸堂上，言不及軍事，談笑侃侃若出諸生下。嗟乎，公於是賢于人

矣。今之大夫士患得患失，祿日豐，則身日重，求其乃心王室奮不顧家者，幾何人哉？況有不茹不吐如公者乎？公本直道取仕，兩爲禦使，三持憲節，又掌符鉞以任方面，既貴且重也，而臨事類如此。視世之沾沾自喜者爲何如焉？然則折衝于萬里，論道于治朝，於是有何有哉？國有人焉，所以重爲天下賀也。吾黨能言之士爲歌詩以美之。匡廬于立序之。至正十年五月日書於艸堂。

右《雲帆駕海圖》，姑蘇從叙子倫所作也，蓋想見軍行於波濤中之萬一（一）。匡廬山人既爲之序，予復作長句以歌道云。崑山顧瑛。

聖神開天撫八方，奄一覆載包鴻荒。五雲樓闕天中央（二），萬國玉帛朝明光。津梁可通海可航，東吳雲帆來稻梁。咄哉饑賊空偃偃，鯀鯨起舞狐跳梁。鎮東將軍龍虎章，旌旗倒影搖扶桑（三）。指揮鐵馬東浮洋，洪濤海岳相低昂。天兵驅先萬鬼行，豐隆列缺從騰驤。彎弧上射星垂芒，劍光爍水百怪藏。鯨鯢逃遁日月光，偃息戈甲峨冠裳。楚人拜跪稱壽觴，願公長年樂而康。願公垂紳居廟堂，坐使聖世如虞唐。功名竹帛聲煌煌，赤松之子同翱翔。

【校記】

（一）想見軍行於波濤中之萬一，黃廷鑑校清鈔本、《四庫全書》本作「想見軍行於波濤□萬一」。

〔二〕五雲樓闕天中央，黃廷鑑校跋清鈔本、《四庫全書》本作「五雲樓閣天中央」。

〔三〕旌旗倒影搖扶桑，黃廷鑑校跋清鈔本、《四庫全書》本作「旌旗倒影採扶桑」。

良琦

至正八年海寇作，千艘萬艘聚島澳。雲旗蔽天架刀槊，人攀檣柁猿猱鬯。焚糧劫帥虜商舶，槌牛擊鼓日飲釀。殺人鬻肉列鼎鑊，天地慘慘風格格。遂令東南日驚愕，奏書聞天天不樂。帝曰吾民罹毒惡，無乃撫字多苛虐。致令頑愚肆兇惡，聖德如天何廣博。宥汝辜厲恩優渥，縱其來歸樂畊鑿。遵海而南地冥寞，詔以官軍歲巡掠。桓桓帥府天東角，元戎總兵閑將略。一朝出巡兵踴躍，千里威聲走風雹。祭神海廟靈肅若，拔劍黑水驅蛟鱷。揮戈直令日倒卻，百怪群妖跡如削。元戎颯爽頭未白，霜月曾照烏臺柏。致君承平海宇廓，丹青輝映麒麟閣。歌詩願奏鼓腹樂，天子遇之汲與霍。

京口石載

扶桑日射旌旗曉，海若愁驚鼓角秋。糧舶如雲抵京邑，元戎談笑定封侯。
大舶雲帆渡海時，海濱父老望威儀。舊時驄馬烏臺客，來把滄溟破賊旗。

落日旌旗海上回，青繩弓劍月中開。船頭官鼓如雷發，野寇驚傳元帥來。
漕府官曹事轉輸，京城三月米如珠。海風不起波濤靜，十日舡行到直沽。
傳宣曉出大明殿，使者南行駕短車。王仗引班催入覲，五雲深處有新除。

東淮殷子義

帥閫當衝要，蠻夷懾武威。海風吹柴戟，江日射戎衣。相國論封久，將軍護餉歸。北瞻天
闕近，官路馬駢駢。

博陵瞿榮智

金符玉節下青冥，錦纜牙檣出四明。曉拂旌旗雲日動，夜鳴笳鼓海波驚。元戎自是威聲
振，聖主無爲道化平。況有掾曹文彥在，賦詩醺酒共登瀛。

武林顧權

風引龍驤萬斛舟，元戎出鎮海西流。甲裳舊洗天河水，金柝宵傳玉帳秋。萑爾蠻酋能職
貢，飛揚壯士識鋤耰。承平閩外應多暇，羽獵宜將小隊游。

淮海秦約文仲

翰海浩無際，澶漫八極連。維天所設險，肇自開闢年。於穆世皇帝，輔弼俱才賢。經邦念儲待，漕粟東吳船。烝嘗備七廟，戍役供三邊。列聖相授受，王道庶不偏。八年建卯月，盜賊起聯翩。剽掠縱烽火，殺戮奮戈鋌。紫垣爲之驚，章奏九重天。廼剖銅虎符，出師蕩腥羶。屯兵駐山徼，係虜來江壩。聖心貴枚寧，宥過許自悛。所期在復業，畊鑿相安然。桓桓帥閫臣，伐鼓聲淵淵。王靈醜類匿，犒樂凱歌還。顧瞻北斗星，錯落三台躔。帆檣聚句吳，旬日達幽燕。徐看驛騎馳，無復羽書傳。江花照裘帽，江柳拂鞍韉。承恩殊命重，許國清忠全。行矣覲龍光，論功丹扆前。

至正十年十二月十九日義興吳國良持倪雲林詩來玉山中相與徜徉

數日將旋索爲別予與玉山同兼柬雲林

郊 韶

吳生陽羨溪頭住，歲晏扁舟載雪歸。江上坐看雙槳去，天邊目送一鴻飛。豈無稚子燒桐葉，知有幽人候水扉。後夜相思心欲折，（一）短簫吹月坐苔磯。（二）

【校記】

〔一〕後夜相思心欲折，黃廷鑑校跋清鈔本、《四庫全書》本《玉山名勝集》作「後夜相思予心折」。

〔二〕本詩，《四庫全書》本《玉山名勝外集》未收入，見《玉山名勝集》卷四。

顧瑛次前韻送吳國良

桐軒隱者重相訪，艸閣能留十日歸。快雪半消春水闊，扁舟又逐白鷗飛。似聞迂叟畊梅里，每過山家歛竹扉。期子幾時來慰我，共披鶴氅坐漁磯。

送于彥成歸越唱和詩序〔一〕

至正庚寅臘月下澣，予與琦元璞、吳國良同寓玉山，時大雪彌旬，日坐雪巢，聽簫酌酒，煮茗賦詩。俄有他故，乘夜泛舟泊楓橋下。雪復大作，匡山于彥成有越上之行，余賦是詩以送之。郊韶九成。

長江幾萬里，送子一扁舟。日落雲帆盡，天空海水流。青春無過燕，白髮有歸鷗。爲語乘槎客，何如汗漫游。

山陰有歸客，雪夜汎扁舟。一笑遽云別，知君靜者流。看山對明鏡，濯足起飛鷗。還載一壺酒，相尋賀監游。

【校記】

〔一〕本詩，底本原無題目，據二十六卷清鈔本補。《四庫全書》本《玉山名勝外集》未收入本詩，見《玉山名勝集》卷四。

良琦次

雪霽春水動，初回賀監舟。青山天際斷，白月鏡中流。竹杖隨行鹿，烏巾照野鷗。蘭亭花
盛日，載酒一同游。
會稽佳山水，羨子一歸舟。步入萬峰裏，坐聽雙澗流。鳴琴對白鶴，躡烏侶輕鷗。東去蓬
萊近，安期待爾游。〔一〕

【校記】

〔一〕本題詩二首，《四庫全書》本《玉山名勝外集》未收入，見《玉山名勝集》卷四。

顧瑛次

江城殘雪裏，人發剡溪舟。花急風翻去，潮生水逆流。傷心憐去鴈，幽興託盟鷗。寄語東
蒙叟，春山擬共游。

吳國良次(二)

三日寒山寺，橋邊共纜舟。看雲坐磐石，濯足俯清流。急雪翻隨馬，澄江靜沒鷗。君歸甬東去(三)，我向竹西游。(三)

【校記】

〔一〕此詩在顧瑛詩下，底本未署姓名。署名據二十六卷清鈔本補。

〔二〕君歸甬東去，二十六卷清鈔本作「君歸越東去」。

〔三〕本詩，《四庫全書》本《玉山名勝外集》未收入，見本《玉山名勝集》卷四。

陳基次

楚楚飛霞珮，飄飄渡海舟。山餘秦篆刻，人有晉風流。好種三株樹(二)，休馴萬里鷗。何當除結習，方外共浮游。(三)

【校記】

〔一〕好種三株樹，黃廷鑑校跋清鈔本，二十六卷清鈔本《玉山名勝外集》，《四庫全書》本《玉山名勝集》，均作「好種三珠樹」。

〔三〕本詩，《四庫全書》本《玉山名勝外集》未收入，見《玉山名勝集》卷四。

陸仁次

正月山陰道，夫君剡上舟。好峰開雪霽，春水匝城流。拭目瞻雲鵠，忘機惜海鷗。多情今夜月，何處照清游。〔二〕

【校記】

〔一〕本詩，《四庫全書》本《玉山名勝外集》未收入，見《玉山名勝集》卷四。

瞿智次〔一〕

匡山于外史，上越有歸舟。久負江湖約，寧知歲月流。瓊書天上鶴，淥水鏡中鷗。一曲真幽絕，當追賀監游。〔三〕

【校記】

〔一〕瞿智次，黃廷鑑校跋清鈔本，《四庫全書》本作「瞿榮智次」。

〔三〕本詩，《四庫全書》本《玉山名勝外集》未收入，見《玉山名勝集》卷四。

張師賢次

江城歲云暮，仙客泛歸舟。交態浮雲變，離懷逐水流。雪空橫獨鶴，沙際渺群鷗。劍珮山陰道，知君獨重游。〔一〕

【校記】

〔一〕本詩，《四庫全書》本《玉山名勝外集》未收入，見《玉山名勝集》卷四。

袁華次

楓橋明積雪，曉發木蘭舟。獨鶴橫江去，三山接海流。綠尊炤烏帽，白髮暎霜鷗。剡曲雲門路，輸君足勝游。〔一〕

【校記】

〔一〕本詩，《四庫全書》本《玉山名勝外集》未收入，見《玉山名勝集》卷四。

于立次

雪消汀艸碧，行子理歸舟〔一〕。落日千山暮，清江萬里流。蕭蕭鳴去馬，渺渺沒輕鷗。自笑

清狂者，真成汗漫游。(二)

【校記】

〔一〕行子理歸舟，《四庫全書》本卷四作「行客理歸舟」。

〔二〕《四庫全書》本《玉山名勝外集》未收入，見《玉山名勝集》卷四。

送鄭同夫歸豫章分題詩序並詩(一)

余辱與鄭文學同夫遇於吳之隱君子顧仲瑛所，仲瑛素多賓客，而同夫與余相值，未暇問姓字、邑里、行李所從來，輒舉酒相與獻酬，雜遝亦不計年齒，貌蒼者上坐，飲酣歌舞，各以所長自適。於是吳興鄭九成、沈自誠、龍門琦上人、赤城金敬德、錢塘俞在明，皆以能詩爲仲瑛文學友。鄭九成素不善畫，捉筆作山水圖，輒爛熳奇詭，坐客嘖嘖稱嘆。同夫首爲賦詩，仲瑛率衆賓和之，而敬德起行酒放歌作《廬山高》，聲聲有梁楚間人氣調。同夫因驩甚，顧謂予曰：「吾自北方來，行數千里，親舊疏數，固自有不同，然飲酒之樂，未有如今日者。吾行且歸矣，諸君能無言乎？」余然後知同夫爲豫章人，嘗登清江范公、蜀郡虞公、豐城揭公之門。而余故人危君太朴、揭君伯防、楊君季子、鄒君魯望、張君宣仲，皆其友也。嗟乎，余恨不及識范、虞二公，而幸嘗獲接揭公之下風而聽其餘論、見其文章。九原不可

復作，而其鄉之士如同夫者，文學才藝一何似公之甚也。同夫歸矣，太朴諸君子皆以其父兄師友之學相繼登臺閣，顧予無似，日與仲瑛賓客笑傲三江五湖之上。以吳中山水分題，得詩若干首，爲同夫贈。余辱爲之叙，因以謝不敏於諸君子云。至正十一年八月五日也，潁川陳基序。

【校記】

〔一〕本題之下的分題詩，《四庫全書》本《玉山名勝外集》未收入，均見《四庫全書》本《玉山名勝集》卷四。

分題太湖

陳基

朝飲太湖水，暮詠太湖秋。太湖三萬六千頃，七十二峰居上頭。上稟咸池五車氣，下浸日月涵斗牛。鴟夷之舟從此游，功成身退合天道，聲名萬古齊伊周。江東步兵輕冕旒，長揖齊王歸故丘。尊羹鱸膾何足道，上與造物同遨遊，唐家拾遺巢許流。躬畊湖上食杞菊，不與濁世俱沉浮。三人之生不並世，出處雖異心則侔。至今血食太湖上，上下雲氣乘蒼虬。今君遙別太湖渚，鼓枻三高祠下路。借得龍城一席風，送君彭蠡湖南去。

【校記】

〔一〕 上稟咸池五車氣，《四庫全書》本《玉山名勝集》卷四作「上稟咸池五雲氣」。

題滄浪池

張 田

滄浪池上水，無日不東流。披竹尋幽徑，携壺趁小舟。雜花分兩岸，叢樹掩雙丘。旭日金波亂，微風碧霧收。直疑來貝闕，豈復辨玄洲。未學乘槎去，還勝太史游。登臨增慷慨，笑語漫夷猶。野老間相過，漁人自對謳。芙蓉晴綵落，菡萏晚香浮。樂事聯長句，忘機狎衆鷗。時逢采芹士，爲說故園秋。翠影侵碁局，晴光漾酒甌。醉深偏繾綣，義合愈綢繆。席故儒官冷〔一〕，堂升弟子優。鄉間傳德業，風教動公侯。司業情猶在，參軍興少留。年華欺短髮，霜落暗征裘。舊里誰無念，亨衢況有謀。世情元兀兀，人事孰悠悠。畫鷁行將去，驪駒唱未休。柳疎縈馬首，帆飽出江頭。別思隨烟浪，懸懷倚柁樓。山昏空晝宿〔二〕，林暮鳥相投。今夜中吳月，分光照薄愁。

【校記】

〔一〕 席故儒官冷，二十六卷清鈔本作「席故儒言冷」。

〔二〕 山昏空晝宿，黃廷鑑校跋清鈔本、二十六卷清鈔本作「山昏雲晝宿」，《四庫全書》本《玉山名勝集》

卷四作「山昏猿盡宿」。

題楓橋

劉西村

涼風起蘋末，送子過楓橋。
落日聞征鴈，空江生暮潮。
星沉吳渚濶，雲入楚山遙。
歸去秋堪把，芙蓉葉未凋。

題震澤湖

良琦

具區開萬頃，波浪入三江。
光怪浮神鼎，馮陵跨石缸。
風高帆影亂，天碧鳥飛雙。
久客瞻南斗，歸心未易降。

題虎丘

郊韶

青山闔閭墓，荒艸起秋風。
古隧蒼精化，陰房玉鴈空。
夕陽明野寺，遠渚落霜楓（一）。
送子難爲別，無情楚水東。

【校記】

（一）遠渚落霜楓，雍正九年鈔本、二十六卷清鈔本作「遠樹落霜楓」。